

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare **FILIPENSES**

1 ¹Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iírujiasiravahi ema Jesucristo. ²Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; náijaracahehini táurivaina eta epanereruana.

Ema Pablo mayaseuchavaca te mayujarasirana ena machamuriana

³Tatiarihi eta te néchahe, nuhasulupayachahi ema Viya íchavenehi éti. ⁴Te tamutu eta tuyujarasirana, tétavicavahi núrisamureva eta tuyaseuchirahehi emutu éti. ⁵Taicha te jena tínapucainapa sache eta nucametaruiruiah eti eyehe, ichapequene eta ímicatasiranuhi. Puíticha enasirichuhi. ⁶Ema Viya, tétavicava eta máurichirahe eti ítaresira cape juca. Núti, tétavicavahi eta nucasiñavairahi mayehe eta máimiyanirovaina eta máurichiraheyare, mavarairahi iuri eti machimapiraheya ema Jesucristo te jena sache machavirayare. ⁷Énerichuvare nucasiñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasiñavahivare vicuticacaipahi eta vijacapirahi eta máimicasirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. ⁸Tímararacanuhi ema Viya eti némunasirahemutu éti, nucutihi ema Jesucristo eti máemunasirahemutu éti. ⁹Nuyaseacahivare ema Viya eti

iápajusiravainahini eta émunaraivaya. Ítupajijiacavahini, támuthuhini ímatiqueneha, apaesa ímatiparacahini eta enerejisiraya eta táuriquenehi.¹⁰ Taicha nuvaraha tápajupanávainahini eta iúrivaina eta ítaresirana, tájina téchípejica-hémahi. Matapiravarehýare, tiúriyarepa eta machimapiraheyare te machava ema Jesucristo.¹¹ Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásicha, tétavicavayarehi eta nacunachirayarehi ema Viya ena achaneana eta náimairahehi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi nútì te juca cárcel, camuriana ena numetaruuanahi eta máemunaraivahi ema Viya eta nayehe.¹³ Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo.¹⁴ Tacutiquene, eta náimairanuhi eta nupresuvahí, ena camurqueneana nuchamuriana táetumechavacainehi eta nacometarairuira eta máechajirruva ema Viya. Vaipa napicahini taicha ichape eta nacasiñavairahi mayehe ema Viáquenu.¹⁵⁻¹⁷ Nararihi éna, tiúrihi eta napanereruana eta náimituresirahi te máijare ema Cristo. Tatupiruvahí eta náichirahi, tásichaquenehi eta náemunasi-ranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihisamisera ena tímiturecanahi te máijare ema Cristo, vähisera tátupiruvaquenénahini eta napanereruana. Nacapinaruraivarichucha, navairahí ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel.¹⁸ Tájinachuchasera táichavahí. Nútì vahi nucapinaruvacaimahi ena nani páureanasami. Ticurisamurechanuanrichucha nútì eta náechajisihirahi ema Cristo namutu.

Énerichu ichapemuriyarechucha eta núrisamurevaya,¹⁹ taicha németeaca tiúriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi.²⁰ Nútì, ichape eta nuvarairahi vähini nucutsirihaini. Nuvaraha nuvapinava eta nímiyanirava nucasínavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahí ema Cristo. Tájina vahi nupicacavahini eta náimicati-chiranuhipuca, támicapacanupuca.²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricacarevaya.²² Téhesera te nítarecarichahapuca, nucamapuravayarehi nucaemata-neacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe.²³ Nuvarahaipanéni níjahúchavahini népenahini apaesa nunaracapaini te machacaya ema Cristo. Eta juca tiúripanahi eta náimairahehi. Vähisera nímatiequeneha tájahapuca eta néhiruyare.²⁴ Néchahevaresera éti, néñamahevare nujunjicahe. Tiúripanaichupuca

vuíchaha nucuepena. ²⁵⁻²⁶Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahlenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, téavicavapaini eta viúrisamurevainahini eta viúrujiacacairaya.

²⁷Eta ítaresiraya, ímereca yátupina eta éhisiraina eta máimiturapiana ema Cristo. Tayanapane váhipuca nucuiteca eta eyehe, ímianavasera eta étumechiravaina eta iúrujiasiracacahi. Nusamairiricahehini táurihini eta ímianiravahi éhica emutu, étanainarichuhi eta epanereru, evapinavahi eta ecametarairuira eta véhiruhi tayehe eta viúchucuiraya. ²⁸Vahi ecuarameca naicha nácani iánaranahí. Eta nacatianasirahehi, tímicae-cherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya. ²⁹Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta. ³⁰Ecutinuripahi eta vicanarajirisiravacahi ena viánaranahí. Éti ímahanurichuhi cape juca eta nucanarairavacahi, puíticha esamairiricanupahivare eta nunasirichuhi nucanaravacahi.

**Tétavicavahi eta masuapajiraivahi ema Cristo. Tásiha
puiti, téavicavayarevare eta masuapacarevare.**

2 ¹Tacahe puiti, németeaca esamavahi eta máetumechirahem ema Cristo, iúrisamurerahivare táichavenehi eta máemunasirahehi; evapinavahivare eta mávhásirahehi ema Espíritu Santo, máimitusirahehi eta ecajirahi ejapanurahihivare. ²Tacahe puiti, nuvaraha étanainarichuvare eta epanereru, ácticacacaini eta ecaematanerasiraina ema Viya; tacuticacahivaréni eta émunasiracacahi. Tásiha, téavicavayare eta núrisamurevaya ícha. ³⁻⁴Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímerecahini eta emansuvaina nayehe ena echamuriana; énahi émunaruqueneananahí. Nativaina ímicatacavaca éna, táetaviuchiravainahini eta náuricacareva ícha. Vahi ecuítajíiva.

⁵Emutu éti iámanahini eta táurivahi eta juca mapanereru ema Jesucristo, tisuapajirahi éma. ⁶Éma, tacahehi eta mapanerueruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi. ⁷⁻⁸Tacahe, manaqueicahi eta mávacuréni. Eta máucupauchirahavihi, macutipaipa mácani achane macahequenechucha eta máuchusirahi. Tamutusera eta máitaresirahi, téavicavahi eta masuapajiraivahi, macutihi mácani moso. Eta masuapajiraivahi, étapa tiámaparauchahi eta máepenirahi te crusu. Titsirihacavahineni, máitauchahisera. ⁹Eta tacahe, ema Viya máijaracapa eta máejasihayarehi tayehe eta anuquehepana mávacreyarehi, étapa eta tacapicahuirahi ichape eta máijare, ¹⁰apaesa námutu nácani tisamanahí eta máijare Jesús, tépuycanayarehi: ena tiávihanahi te

anuma, énapa ena tiávihanahi te apaquehe, énapa ena nacaerataquenehi puiti te amahe apaquehe. ¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

Tétavicava eta najaraiva ena téhicana ema Jesús, nacuti eta jarairiqui

12-13 Núti nucunachahehi, eti nuparapenaveana némunaruqueneanahí, taicha tétavicavahi eta esuapiranuhi te nutiarihirichaha te echacaya. Puítisera nuvaraha tápajucavaini eta esuapiranuyare, puiti eta nuyerehirahéhi. Ema Viya, émarichuhí ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásicha, muracaina eta ejaneasirava tayehe eta tájiparacana, epicavarení eta ímicatisamurechira ema Viya. Tacuija táemitiequenehahini eta tapachinavahi eta iáchanevana.

14 Te tatíarihinapuca jácani íchaqueneanayare, vahi ecuevataemachavaca, váhivare ecuacapauchava, **15** apaesa tacuija échajisiacarevaina emutu.

Tacujavare etapiravainahi eta náimairaheyare ena achaneana. Ímerecavayarehi eta machichahérahi ema Viya, tájina táechipejicahehini nayehe ena achaneana váinarajipaneréuana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi. **16** Ímitucavacahini eta máechajiriruva ema Viya, eta íchu hairavacavare náehicavare, apaesa náuchucuhahini tayehe eta apána náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneahí, tétavicavainapa eta nucunachiravaya nútí íchavenehi éti eta táurivahi eta nímitusirahehi. Vahi támapurujihini eta nucaemataneasirahí ema Viya. Ticutihi eta iámavahuhi mayehe. Núti, tijuricati táimicapacanupuca eta nucametarairurahí eta eyehe. Eta népenirainapucaini tacutiyareva eta námvahuhí mayehe ema Viya, tacachane eta iámavahuhi éti. Núti nuvapinavahi eta níjarasiravahi népena, núrisamurehivare eta nucamavahuirahí me Viya. Nuvaraha iúrisamureyareva éti apanava. Vahi ecucatiedequenehanu. Ácutinu eta núrisamurevahí nútí.

Ema Timoteo émapa ema Epafroditó, vanairucanayare me Pablo

19 Núpanerechahi névatacayaréni ema Timoteo eta ara eyehe, máimaha-panahe apaesa núrisamurepaini eta nusamairirisiraheya te machavapa. (Máimahahavirinesera ema Viáquenu Jesúz eta vítujsiravaya.) **20** Taicha ema Timoteo, yátupihi macutinuhi eta nuhasamurechirava eta iúricarevainahini éti. Nájina apanainahini nácutihini éma. **21** Nararihinéni ena apamuriana, énachuchasera tiyauruircavanahí. Vahi tihapasamu-rechavanimahi eta iúricacarevaina eti machaneranahí ema Jesucristo. **22** Ímatiripahi éti eta máurivahi ema Timoteo eta máimicatasiranuhi tayehe eta vicametarairurahí, tacutihí mácani machicha ema achane, eta táurivahi eta máimicatasirahí ema máiye. **23** Vuíchahasera névatacaimahi éma.

Néchanumayare eta juca níchararacavayare te juca. ²⁴Nucasiñavahinénisera mayehe ema Viáquenu Jesucristo eta nútijacarúvainahini nímahapanaha.

²⁵Tásihasera, nupanerechahi névatacahiravéni puítirichu ema apana viparape Epafrodito, ema évataruhi tímicatacanuyarehi, tiámapahivare eta enaquiruvana. Puiti éma, tétavicavahi eta máimicatasiranuhi tayehe eta juca vématanerepihi, vicanarairahi eta tamauriqueneana. ²⁶Mavarahaipaichavare tímahahe éma apanava. Téñamavaipahi eta eyehe emutu éti taicha máechahi eta esamairirisirahi eta macajumairahi. ²⁷Yátupihi eta macajumairahi, tiánehiyarehini tépena. Majapanuhisera ema Viya; tinaracahi. Tijapanunuhivare nútí apana apaesa vahi nucueñamava-hichaini, vahi tacuapiquianuhini eta néñamiravahi puiti. ²⁸Eta tacahe, nuyayaucha puiti névataca éma, apaesa eta ímairainahini éti, iúrisa-murevarepaini. Te néchapa eta iúrisamurevahi, étapa tacaepaha eta néñamavahi eyehe. ²⁹Táurisera eta ejacapiraina éma te esamureana, taicha yátupihi echamurihi éma eta éhisirahi ema Viáquenu. ³⁰Taicha éma, yátupihi tiánehipa eta máepenira, táichavenehi eta táetaviuchirahi eta mavaraира macaematananeaca ema Cristo. Váhiqene tiyavanavahini eta máitaresirahi, taicha muraca eta mavaraира máitaucha eta etupara-siranahi mayehe. Taicha éma ítsivahi éti, eta vahi ítujicavahini ítecahini etijacarúvainahini ítatinuhini.

Tiúripana véhica eta juca yátupiqueneana

3 ¹Nuparapenaveana, evapinava eta macachaneraheripa ema Viáquenu. Nútí, vahi nuyacuji eta nápechirayare numetacahe te juca néchajiriruvahí te nájure taicha eta tiúrichaheyare éti. ²Échapavayare nayehe nácani achaneana tipamicaheana éhica eta mavanairipiana ema Moiséini, navarairahivare ecamacravare, náimijachahi machaneraheya ema Viya taicha eta ecamarcairahi. Ena nani, tétavicavahi eta náiñehivahi eta náemejecapirachira ena vichamuriana. Éna, nacutihu eta jácani tamucu tétavicavahi eta tanicaraivahi. ³Jéhesaresera víquenehi machaneranahí ema Viya yátupiquenehavíhi. Vicamarcaqueneanahí viti te visamureana maicha ema Espíritu Santo. Víquenehi yátupiquenehavíhi vare viti véneuchavahi me Viya. Vivapinavahivare táichavenehi eta vicasiñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha. ⁴Jéhevare nútí, táuricahinéni nucasiñavahini nútí nusamacarehini, taicha nítouchahí tamutu eta viyeherepiana viti israelítana. Nucachuricahi ena nujaneanana. ⁵Nútí yátupiquenenuhi israelítanuhi taicha nucamarcaripahi te óchopa sache eta núchusirahi, nítouchahí éna eta viyeherepi. Mámariéquenenuí ema Benjamín. Yátupique-nenuhi hebreo. Yátupiqueneanahivare hebreoana ena ticachichanuana, énapa ena náchucanaveanaini. Nútí náchumurinuñihivare ena fariséoana. Nítucahi nímicapicaucha eta náitauchiraina yátupi eta viápajusiravahi religiósohavíhi nayehe ena apamuriana nujaneanana israelítana. ⁶Eta nímicapicauchira, ichape

eta nupanajirisiravacahi ena náinapureana creyénteana. Nucasiñavahi nútí eta nítouchirahi yátupi eta viyeherepiana. Tájina néchajisiacarevahini nayehe ena achaneana. ⁷Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusiñavirainihi. ⁸Tacahe, eta nímairahi, váhinéni étaparacainahini tayehe eta viúchucuiraya. Puiti nínajicapa tamutu etá júcana, taicha tihapapicanuhi eta néhisirayarehi ema Cristo; táichavare vahi táchutihini eta tátetaviuchiravahi eta táurivahi eta néhisirahí ema Náquenu Jesucristo. Puíticha tamutupa némitisica. Émachucha nucaemata-neacahi. ⁹Puiti eta návahásirahí éma, vahi étainahini eta táurivahi eta néhisirahí eta viyeherepiana. Ema Viya tijacapanupa táichavenehi eta nucasiñavairahí me Cristo. Taicha namutu ena ticasíñavanahí éma, tijacapacareanaya me Viya. ¹⁰Nuvarahahi nútí tajurucachucha eta nímatirayarehi ema Cristo. Nuvarahavare tacuija tahapapica eta macaematanasiranuhi, máimeresirahí eta tátetaviuchi-ravahi eta máitupajijiasiravahi, tacutipa eta máechehusiraipa éma te máecari. Nuvarahavare nucapayayarácahivaréni eta macatajivairahí. Étapa eta népenira, nuvarahavare táurichavacayare ena nuchamuriana, táchutihini eta táurichirahavíhi eta máepenirahí ema Jesús. ¹¹Taicha nútí nucaunehi eta néchepusiraya nútí apanava te nécarí.

Yátupiya eta vicaratasiravaya te vivaraha vítujicava viveha eta vícuchihi

¹²Nútí vahi nímijachavaimahi tamutuhini nítoucha eta nítujisiravaya. Vuíchaha nítamuturuca. Nímiyanavaichuchasera eta nupamisiravahi, nuvarairahí nucurisamurechayare ema Cristo te tamutu, taicha eta tacahehi eta máichuiranuhi néhisirayare. ¹³Nuparapenaveana, yátupi-quenehi vuíchaha támamu nucapayayaracahini. Nuvarahaipasera némitisicayare tamutu eta nunaquiruana. Tásiba, néturnechavainapa eta nítouchiraya tamutu eta mavarahaqueneanahi níchaqueneanayarehi. ¹⁴Nupamicavahi taicha ichape eta nuvarairahí nucurisamurechahini ema Viya, nuvehahini eta nícuhihi mayehe. Taicha eta tacahehi eta máichuirahavihi, mavarairahí tíjaracahavi eta viúrujiasirahí ema Jesucristo.

¹⁵Tacaheyarehi eta epanerechirayare éti. Ecuyutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya. ¹⁶Jéhesare, yátupina vímiyanava véhica tamutu eta vímitucasivanahi.

¹⁷Nuparapenaveana, nuvaraha yátupina ácutinu nútí eta núrivahi eta nítaresira, éhicavaréni eta náurivahi ena apamuriana téchemachanaripa. ¹⁸Ichapemurihi eta nutuparasirahehi tayehe eta juca. Puiti eta nápechirahehi numetacahehi, níyahasamurehi taicha nararihichaha ena vuíchaha náimati-queneha eta tacayemaquenehi eta máepenirahí ema Cristo te crusu. Eta nacatichirahí, vahi navaraha nasamararaca te véchajisiha. ¹⁹Ena nánisami témitiequeneanayare taicha téavicava eta tavayuasiravacahi eta najamu-rachaqueneana. Nacasamurechucha eta tájiparacana te juca apauehe.

Tisiñavavaicanahi, tivapinavanahí eta náichirahi eta tamauriqueneana titsiri-hacareana.²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, másihairaya te anuma.²¹ Máitsivachainapa éma eta juca viáquehesami. Apanainapa eta táimahiyare. Tacutinapa eta macáquehéra éma, tapachinaquenehi. Tétavivainapa eta tatumevayare taicha ichapequene eta máitupajijiasiravahí éma. Maratahahi macapaquecha tamutu.

Iúrisamurereacavayare me Viáquenu

4 ¹Nuparapenaveana némunaruqueneananahi, tétavicavahí eta nuvarairahi nímahahe, taicha nucajamurahehi éti, tétavicavahí eta núrisamurevahí ícha. Puiti nuvaraha ímiyanava túmehéna tayehe eta éhisirahi ema Viáquenu, eti némunaruqueneananahi.

²Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu.

³Nutuparacavivare, piti némunaruquenehi nucompañeruvihí: Pímicatacavacahini ena nani apinana esenana viparapenaveanahí, taicha éna ichapemurihi eta náimicatasiranuhí tayehe vicametarairuirahi. Náimicatacahi ema Clemente, énapa ena apamuriana ena nucompañeruanahí. Eta nájjareana ena nani ticajuanaripa tayehe eta libro tiama eta víjareana viti vítareruanayare.

⁴Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe.⁵ Námutuhini ena achaneana náimatihehini éti eta táetaviuchirahi eta iúriva. Taicha ema Viáquenu, tiánehipa eta máitesiraya.

⁶Vahi ecueñamava, te tatarihinapapuca eta íchava. Ecasíñavasera eta eyaseasira ema Viya te eyujasarirana. Ehasulupayachavare tayehe jácani máijararuheanahí.⁷ Jéhesare, ema Viya macaepahayare eta jácani ecatismurevana eta juca máijarasiraheyarehi táurivayare eta esamureana étapa eta epanereruana, táichavene eta iúrujiasirahí ema Jesucristo. Eta macurisamurechirahavihi ema Viya, tétavicavahí eta tacachuriasirahí eta nacurisamurechira nácani achaneana.

Epanerechayare eta táuriqueneana

⁸Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta tipicauchacareana, tayehe tamutu eta ítauraivaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahí ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹Ímiyanava éhica eta nímiturapiana. Ítauchayare eta numetarapianahí esamararuaruanahí. Ácutinu eta níchaqueneanahí ímahaqueneanahí.

Ítauchaya eta juca, tásicha ema Viya, tamutuinapa tíjaracaheyare eta táurivaya eta epanereruana éti.

**Tinaquiquicavanapa ena machamuriana
ema Pablo, náimicasasiraya éma**

10 Tétavicava eta núrisamurevahí eta mayehe ema Viáquenu eta máijara-sirahehi éma eta epanerechiranuhi tayehe eta íapechavahí ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi.

11 Vahi táichavenénahíni jácani nuvayuchiravainahini eta nucamunuirava. Núrisamuréichucha, nítucasamihí nútí eta nítátiravahí tayehe jácani tatiarihiquenehi. **12** Nítucahi eta nítaresirahi puiti eta nupauréravahi. Nítucuhivare te nucaimahaquenéichaha. Nítucahi eta nucamichirahí eta nátajivanahí, te nunicapuca, váhipuca; te nucaimahaquenéhipuca, te tájinahivarepuca nímahaquenénahíni. **13** Nútí nuratahahi nucamicha tamutu, taicha ema Cristo éma téturechanuhi. **14** Tájinaserá táichavahini eta ímicasasirahuhi tayehe eta ímiámareruhi, evarairahi ímerecanu eta émunasiranuhi, ítátiranuhi eta numaitujisiravahi nutanuchavahiní.

15-16 Eti nuchamuriana, nucunachahe eta némechirahéhi eta ímicasasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahí eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íapechavahí ímiámareca eta enaquiruvana. Jéhevare nájina apamurianainahini nacutihehini eta ímicasasirahuhi. **17** Váhisera étainahini jácani nuvarairahini íapechavahini ímiámareca eta nuyehe eta enaquiruvana. Nuvarahahi níminecapae-quenehahe: Eta ímictaraivahi te juca apaquehe, puiti te anuma ánaqui táurujisiavahi eta enaquiruvana te mamirahu ema Viya. **18** Nuti ichape-muripa eta nujacapirahi eta enaquiruvana, eta mámaquenepahí ema Epafroditó. ¡Tétavicavahí eta ecajiraivahi! Eta ímiámareruana, tacutirinehi eta inciensoinahini, eta tájiyevahí te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavhahuana te Templo. **19** Máimahéine ema Viya. Éma, máitsivachayare tamutu eta enaquiruvanahí. Tíjaracaheyare te jácani ecamunuiravana. Émarihi téchayarehi ema Viáquenu Jesucristo. Éma, tétavicavahí eta tamutuira marataha. **20** ¡Máichecuaraqureyare eta vicunachiraya ema Tata Vicaiyu-nehehi, tijarahi eta vijirauchira éma! Amén.

Eta táichecuaraqui eta macartane ema Pablo

21 Eta iúrujasiracacahi mayehe ema Viáquenu Jesucristo, nuvaraha échajisinanuini namutu ena machaneranahí ema Viya, vichamurianahí eta véhisirahi ema Viáquenu Jesucristo. Téchajicaheanahí éti ena nucompa-

ñeruana, ena nucachanequeneanahi ani te juca. ²²Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

²³Nuyaseuchaheparaca emutu éti me Viáquenu Jesucristo táetavica-vahini eta iúricacarevaya máicha.

Tamutupa eta néchajiriruvanahi eyehe.